

## **Ralph Regenvanu, Indipenden Kandidet, Port Vila, 2008**

### **BIGFALA TINGTING**

- 1. Soemaot wan niufala kaen fasen blong save mekem gudfala lidaship olsem wan MP mo wan nasonal lida**
- 2. Lukaotem gud kastom ekonomi (graon, envaeronmen mo kastom)**
- 3. Givim moa janis long ol man-ples blong kam antap insaed long ekonomi blong waet man (kash ekonomi)**
- 4. Givhan long ol komuniti blong oli save lukaotem olgeta nomo (givhan wetem trening, advaes mo watu)**
- 5. Leftemap rol blong ol jif, ol jioj, ol woman mo ol yut long disisen-meking (olgeta “4 leg” blong komuniti)**
- 6. Enfosem ol loa blong kantri – mekem se evri man i mas folem loa**
- 7. Mekem se Gavman i spendem mane long wan fasen we i stret mo yumi evriwan i save long hem**

### **“Gud gavenans”**

1. Holem wan referendum blong jenisim Konstityusen blong blokem 18 jea insaed long Parlamen blong ol woman (aot long 52 jea evriwan)
2. Karemaot politik insaed long ol bod blong ol statutori bodi long fasen olsem:
  - a) evri memba blong ol bod i mas bi wan man o woman wetem kwalifikesen mo ekspiriens long eria konsen
  - b) i mas gat wan-wan memba we Malvatumauri, VNCW, VCC mo ol yut oli jusum
  - c) wan aot long evri tri memba blong bod i mas bi ol woman
3. Putum bak paoa blong Ombudsman blong save putum wan lida long kot blong karem bak mane we hemi stilim (long wan sivil kes)
4. Putum bak rul se Ombudsman i mas pablisim ol “annual return” blong ol lida, blong pablik i mas save
5. Mekem se sipos Pablik Prosekyuta i no putum wan lida long kot afta long 3 manis afta wan Ombudsman ripot i kamaot, Ombudsman o eni narafala man o organaesesen i save putum lida ia long kot
6. Putum ol lida we Ombudsman i talemaot se oli brekem loa i go long kot (olgeta we taem blong putum olgeta i go long kot i no pas finis)
7. Leftemap wok blong Odita Jenerol, blong hemi save mekem gud wok we Konstityusen i givim long hem
8. Givhan long Pablik Sevis Komisen blong mekem wok blong ol wokman blong Gavman i kam moa gud, mo blong mekem se ol defren Dipatmen blong Gavman i wok tugeta moa gud
9. Stanemap Loa Rifom Komisen blong mekem ol rekomendesen long saed blong jenisim Konstityusen mo ol narafala loa blong kantri
10. Leftemap bajet blong Pablik Solisita 10 taem, blong moa man i save kasem givhan blong wan loya
11. Pasem wan “Politikel Parti Finansing Akt” blong mekem se ol politikol pati i mas talemaot se oli kasem mane blong olgeta wea
12. Pasem wan loa blong mekem se wan MP i mas yusum ful alokesen blong hem 6 manis bifo long wan eleksen (Gavman bae i holem taet haf mane we hemi no yusum)

13. Jenisim ol loa long saed blong eleksen blong:
  - a) talemaot stret wanem samting hemi pat blong wan kampein
  - b) putum wan taem bifo long eleksen we wan propos kandidat o wan politikol pati i no save talemaot se hemi mekem wan niufala projek blong Gavman
14. Karemaot (ripilim) seksen 23(1)(e) blong *Representation of the Peoples' Act* blong letem ol wokman blong Gavman oli kontes long ol eleksen. Pablik Sevis Komisen i mas letem olgeta blong lego wok blong kontes, mo sipos oli no win blong save kambak long wok bakagen
15. Mekem se Gavman i no save blokem ol NGO blong kasem mane long ol foren Gavman o organaesesen, be mekem se evri NGO i mas talemaot long Gavman wanem wok we oli stap mekem blong i nogat duplikesen blong wok
16. Stanemap Vanuatu Nasonal Media Kaonsel blong givimaot ol brodkas laesens blong mekem radio o TV (karemaot wok ia long VBTC)
17. Dvelopem ol niufala fasen blong meserem ekonomi, blong luksave kastom ekonomi mo kwaliti blong laef, stat long 2009

### **Graon mo fasen blong yusum graon**

1. Bae i nomo gat eni niu lis long ol kastom graon kasem taem we i gat ol "Physical Plan" blong ol graon ia mo Plan ia i kamaot long Gavman Gazette
2. Bae i nomo gat eni lis long ol pablik lan long Port Vila mo Luganville
3. Gavman bae i pemaot ol graon long Port Vila we i nogat developmen long olgeta yet mo putum ol graon ia long han blong komuniti, blong komuniti i save yusum blong mekem garen mo bildim ol nakamal o ples blong miting long hem
4. Leftemap wok blong Dipatmen blong Envaeronmen blong save enfosem ol loa blong protektem envaeronmen
5. Karemaot paoa blong Minista blong Lands blong saenem lis long wan graon we i nogat lis long hem bifo long nem blong ol lanona we oli stap dispyut. Minista bae i gat paoa nomo blong saenem lis long bihaf blong ol lanona we oli dispyut olsem:
  - a) long wan lis we i stap finis mo we i gat wan developmen long hem we i bitim 15 milion vatu
  - b) sapos ful kaonsel blong Malvatumauri i givim raet long hem
6. Mekem bisnis blong ril estet i kam wan "reserved" bisnis we ni-Vanuatu nomo i save mekem, folem bigfala lukluk blong Konstityusen. Ol foren ril estet kampani we oli stap naoia long Vanuatu bae oli gat 6 manis blong klosem bisnis mo aot long kantri
7. Sipos wan man i salem wan lis long rurol eria, 30% blong vatu we man ia i winim i mas go bak long kastom ona
8. Implimentem ol resolusen blong Land Samit
9. Mekem se bae i mas gat prapa Envaeronmental Impak Asesmen (EIA) long tufala fish prosesing faktri we oli wantem mekem long Paray Bay mo Blaksan long Efate, ol fanis blong buluk we oli wantem mekem long Malakula mo Epi, oel pam plantesen we oli wantem mekem long Santo, mo evri "quarrying" mo maening projek
10. Stopem plan we i stap blong fulumap Fatumaru Bay blong mekem ples blong ol haos blong ol waet man

### **Katem daon kos blong Gavman**

1. Mekem se ol salari blong ol MP i kam daon kasem 200,000 vatu long wan manis, mo mekem se bae i nogat eni inkris long ol salari, alaoens o alokesen blong ol MP blong ful 4-yia term blong nekis Parlamen
2. Bae i nogat siting alaoens blong ol standing komiti blong Parlamen

3. Karemaot (ripilim) niufala loa we i givim Gavman “pension” long ol olfala Praem Minista, Presiden mo Presiden blong Malvatumauri blong ful laef blong olgeta
4. Karemaot (ripilim) *Official Salaries Act* (putum andanit long *Government Remuneration Tribunal Act*)
5. Sapos wan MP i kam wan Minista, bae oli lusum MP salari mo alaoens blong olgeta
6. Lukluk long evri samting we Gavman i spendem mane long hem, afta katemaot ol samting we i nogat tumas nid long hem
7. Implimentem niufala polisi blong Pablik Sevis Komisen long saed blong ol trak blong Gavman
8. Kontrolem fasen we ol MP i spendem ol alokesen blong olgeta blong mekem se i nogat misyus. Bae Dipatmen blong Faenans i givimaot ol alokesen mo Odita Jenerol i jekem (“auditem”) evri yia

### **Edukesen**

1. Karemaot skul fi long ol praemeri skul blong Gavman (priskul kasem yia 8) stat long 2009, mo mekem praemeri skul hemi “compulsory”
2. Givim moa skolaship blong ol yia 13 “bridging” kos, ol yunivesiti kos mo ol “post-graduate” kos. Givim 10 skolaship blong ol PhD evri yia
3. Trening mo Skolaship Unit blong:
  - a) sapatem ol studen we oli gat skolaship we i no blong Gavman
  - b) faenem ol wok blong ol studen we hemi givim skolaship long olgeta
4. Leftemap ol USP program long Emalus Campus mo long ol USP sab-senta long Tanna mo Luganville, mo stanemap ol sab-senta long trifala narafala Provins
5. Stanemap wan Nasonal Taskfos long saed blong Edukesen blong daerektem wok blong jenisim ful edukesen sistem
6. Jenisim nasonal praemeri mo sekonderi kerikulum (wanem we oli stap tijim long skul), mo stat blong tijim niufala kerikulum long 2011:
  - Niufala kerikulum blong tijim save mo hao blong yusum save long saed blong:
    - lukaotem gud envaeronmen
    - save gat kakae oltaem (“food security”)
    - save gat eneji oltaem (“energy self-sufficiency”)
    - “social security” (we i kavremap famli laef mo helt)
    - hao blong stretem problem o rao-rao
    - hao blong lukaotem gud mo sevem vatu
    - hao blong bi wan “gud sitisen” blong kantri
  - Fes step blong jenisim kerikulum hemi blong jenisim subjek “General Knowledge”/ “Connaissances Générales” long praemeri skul i kam wan subjek “Aedentiti mo sitisanship”, mo blong putum niufala subjek ia insaed long sekonderi skul tu, hemia long stat blong 2010. Long klas 1 kasem 5 bae niufala subjek ia i tijim fasen blong lukaotem envaeronmen yusum kastom save mo saens blong waet man, mo folem ol prinsipol blong kastom mo Kristianiti
7. Mekem edukesen sistem i tijim fulap lanwis folem wanem we Nasonal Lanwis Polisi i talem (hemia i kavremap lanem blong rid mo raet long nativ lanwis blong pikinini)
8. Sapatem ol NGO blong givhan long ol bigfala man mo woman blong save rid mo raet

### **Promotem ni-Vanuatu insaed long bisnis**

Longfala eim: Blong balanssem lokol mo foren onaship blong vatu ekonomi blong save gat nasonal sikiuriti. Ol step blong mas kasem:

- a) Ni-Vanuatu i ownem 30% blong vatu ekonomi long 2020
- b) Ni-Vanuatu i ownem 67% blong vatu ekonomi long 2050

c) 67% blong ol ni-Vanuatu oltaem i mas bi ol indijenes (i no naturalaes) ni-Vanuatu Jenisim Nasonal Invesmen Polisi blong hemi soemaot hao blong save kasem ol step ia blong ajivim longfala eim

1. Putumbak mo enfosem loa mo polisi we i stap finis long saed blong “reserve list” blong ol bisnis we ni-Vanuatu nomo i save mekem. Ademap jenerol stoa, bisnis blong mekem video mo CD, mo ril estet insaed long risev lis. Mekem se eni niu foren invesmen long kantri i mas bi wan joen ventja, we ni-Vanuatu i ownem 50%
2. Evri ni-Vanuatu bisnis we “turnover” blong hem i no kasem 4,000,000 vatu long wan yia i no nid blong pem bisnis laesens
3. Sapotem mo promotem ol “micro-credit” skim olsem VANWODS, mo mekem wan spesel micro-credit skim blong ol yut
4. Stanemap wan koperativ “assurance mo savings” skim we ol bas mo taxi draeva i save yusum blong insurem olgeta (blong oli nomo pem insurens long ol insurens kampani, be long skim blong olgeta nomo)
5. Promotem kompetisen long ol bisnis sekta we i gat 1, 2 o 3 kampani nomo i stap mekem bisnis long hem (ol “oligopoly”)
6. Pasem wan loa se 40% blong ol infomesen o program we wan lokol media kampani hemi givimaot oli mas mekem long Vanuatu nomo o hemi mas bi abaot Vanuatu
7. Mekem wan kopiraet loa blong protektem mo promotem ol lokol kampani mo artist. Wok wetem ol kantri blong MSG blong developem wan sistem blong save protektem kopiraet blong ol lokol kampani mo ol artist long ol Melanesian kantri long rijenel level
8. VANWODS bae i tekova long raning blong Port Vila market haos. Graon we market haos i stanap long hem bae i stap olsem pablik land, mo Gayman bae i pemaot graon long saed blong market (we naolia hemi blong Iririki Resort) blong yusum blong mekem market i kam moa bigwan

### **Leba**

1. Pasem “Employment Relations Bill” (blong jenisim *Employment Act*, *Trade Unions Act* mo *Trade Disputes Act*)
2. Pasem “Occupational Health and Safety Bill”, mo ademap insaed long hem se Union reprisentativ bae hemi “Workplace Health Officer”
3. Leftemap wok blong Dipatmen blong Leba blong save enfosem ol leba loa
4. Stanemap wan “Employer’s Federation” we hemi gat raet anda long loa blong reprisentem ol employa
5. Leftemap wok blong Vanuatu Nasonal Woka’s Union
6. Mekem se evri man we oli wantem go wok long Niu Silan anda long RSE skim oli mas joenem VNWU fastaem, blong ol union long Niu Silan i save lukaotem raet blong olgeta taem oli stap long Niu Silan
7. Bambae ol komuniti nomo oli sendem ol man blong go wok long RSE skim long Niu Silan (mo long Australia long fiuja taem). Bambae wan-wan man i no save go long tingting blong hem wan nomo

### **Eneji**

1. Stat blong planem bak evri plantesen blong kokonas long 2009, blong yusum kokonas blong mekem oel, benzin mo mazut
2. Developem ol stret teknoloji blong save mekem benzin long kokonas (mo ol narafala samting), mo blong save mekem elektrisiti yusum san (solar) mo riva (micro-hydro)
3. Vanuatu Institut blong Teknoloji mo ol Rurol Trening Senta blong givim trening long saed blong mekem benzin long kokonas (mo ol narafala samting), mo blong stanemap

mo mentenem ol masin mo ol enjin blong tanem kokonas i kam long oel mo benzin, mo blong mekem elektrisiti yusum solar mo micro-hydro

### **Disentralaesesen**

1. Stat blong muvum ol hed ofis blong ol Dipatmen blong Gavman i go long ol aelan. Stat wetem evri Dipatmen andanit long Ministri blong Agrikalja, Forestri mo Fisheri, blong evriwan i muv i go long Luganville long 2009
2. Stat blong implimentem ol rekomendesen blong Disentralaesesen Komisen Riviu ripot long 2009

### **Givim paoa long Malvatumauri**

1. Pasem wan loa blong implimentem artikol 30(2) blong Konstityusen blong mekem se Malvatumauri i mas apruvum eni loa we i tokbaot o i tajem graon o kastom
2. Malvatumauri mo ol Provinsel Gavman blong stretem mo maredem strakja blong olgeta

### **Agrikalja**

1. Mekem se yumi mas prosesem ol lokol kakae blong yumi
2. Promotem polisi blong mas mekem 3 garen: wan blong kakae, wan blong salem mo wan blong kastom mo seremoni
3. Stopem yus blong ol kemikel long agrikalja mo diklerem Vanuatu wan kantri we kakae blong hem i “100% organic” (nogat kemikel long hem)

### **Turism mo Tred**

1. Tanem tingting blong turism developmen i go blong promotem turism long saed blong envaeronmen mo kastom long rurol eria we ol man ples i ownem
2. Stopem evri negosiesen blong joenem WTO, EPA mo PACER (ol intanasonal tred agrimen) kasem taem we yumi skelem gud ol agrimen ia long saed blong wanem bae oli save mekem long yumi long saed blong ekonomi, sosel laef mo envaeronmen blong yumi

### **Haos**

1. Gavman blong pemaot ol graon long Port Vila mo Luganville mo letem blong ol famli mo ol komuniti long tufala taon ia we oli nogat graon yet blong oli save pem sloslo (artikol 81 blong Konstityusen hemi tokbaot hemia long saed blong kastom graon)
2. Stanemap mo promotem ol program blong givhan long ol pua famli blong save mekem gudfala haos

### **Ol sosel isiu**

1. Bildim wan spesel haos blong save bonem bodi blong man taem hemi ded long beregraon long Port Vila (from we i nomo gat spes blong berem ol man)
2. Jenisim ol loa blong Vanuatu long saed blong drags. Mekem se sipos ol Polis i kasem wan man i stap smokem mariwana, be hemi no stap salem, bae hemi gat wan smol faen be oli no save arestem hem (hemia i semak olsem sipos oli kasem wan man we wan laet blong trak blong hem i no wok)
3. Putum taem we kava bar i mas klos long hem, mo givim paoa long komuniti blong enfosem taem ia
4. Jenisim *Tobacco Control Act* blong letem ol man blong save salem frut sigaret

5. Promotem yus blong stret kastom mane mo risos long ol kastom seremoni, i no watu o ol samting blong waet man
6. Mekem wan Nasonal Populesen Polisi bifo en blong yia 2009

### **Foren polisi**

1. Stat blong toktok wetem Franis kwiktaem blong stretem rao-rao we i stap naoia long saed blong ol aelan blong Matthew mo Hunter. Stretem rao-rao ia long fasen blong ‘compromise’, afta wok kolosap wetem Franis blong ademap sam moa eria blong solwora i kam insaed long eria we Vanuatu i gat naoia folem proses blong intanasonal loa. Bae yumi nomo save ademap sam moa eria insaed long eria blong Vanuatu afta long namba 19 Mei 2009, mo yumi no mas mestem janis ia blong mekem
2. Toktok oltaem long intanasonal level blong sapotem indipendens blong West Papua. Leftemap ol eksjenj long saed blong kalja mo edukesen wetem Indonesia, be no akseptem eni mane long Indonesia kasem taem we West Papua hemi kasem indipendens
3. Holem taet mo bildimap RSE skim wetem Niu Silan
4. Wok kolosap wetem Gavman blong Ostrelia blong openemap rod blong ol man Vanuatu i save go wok long “seasonal labour” long Ostrelia tu
5. Holem taet Law Skul blong USP oltaem long Vanuatu
6. Lukluk bakagen long nid blong gat ol konsul mo ambasada blong yumi long ol narafala kantri folem hamas mane yumi stap spendem long olgeta mo wanem benefit oli karem blong yumi
7. Karem mane we ol plen i stap pem blong flae antap long Vanuatu, we naoia Fiji i stap kasem

### **Ol narafala polisi i stap long:**

- 1) **Aksen Plan blong Luksave Mo Leftemap Kastom Ekonomi Olsem Stampa Blong Kasem Nasonal Self Reliens**
- 2) **Vanuatu National Self Reliance Strategy 2020**
- 3) **Ol rekomendesen i kam long Lands Samit blong Malvatumauri, Nasonal Self Reliens mo Advokasi Koalisen long Ekonomiks**
- 4) **Interim Transisional Strateji mo Fiuja Plans Blong Implimentem ol Resolusens blong Nasonal Land Samit 2006**
- 5) **Ol polisi objektiv blong Yia blong Kastom Ekonomi**